

De Jibler [dʒibler]



jungwacht
blauring

1. Du gspürsch es esch bald eso-wiit. D'Ver-chlei-digs - chisch-te send wäg. Du gsehsch die Gfang-ne uf em
Floss. D'Stra-te - gie esch be - redt, di - ni Uf - gab esch klar: S'Glän-de - speel goht loos!

Und mer be - we - ge öi - si Wält. Oh oh oh bou-gez, bou-gez. Oh oh oh oh oh!

Strophe 1 - Aargauerisch

Strophe 2 - Oscht-CH

Du sitzisch am Lagerfüür
und d Wärmi stiegt i dis Härz.
Du schauklisch zu de Melodie.
Jetzt klatsched öpert id Händ,
de Takt isch omnipräsent.
Springed uf und stieged iii:
...und mir beweged üsi Wält.

Strophe 3 - Lozärnerisch

De Lagerhöck esch verbii.
D'Siesta esch voll im Gang.
Wiit ond breit esch niemert z'gseh
Ond de chonsch du of de Platz
met em Bau i de Hand
Ond aui Chender rüefed: yeeeah!
... ond mer beweged öisi Wäut.

Strophe 4 - Seislerlütisch

Dis Dorf, as döst vor sich hi
S'isch iifach nie öppis los
Nach de Schu gö d'Chinn grad hiim.
Dä Samschtig würd's anders si,
As Spüturnier va de Schar
Und ds ganzi Dorf isch uf de Biüüü!
...u mier bewege üsi Wäut.

Strophe 5 - Zürütütsch

Es isch de erscht Tag vom Kurs
D Teilnähmer sind motiviert
Doch si händ all no gar kein Plan
Du gisch dis Wüsse gisch alls
und dänn am Ändi schtönds da:
Die neue Leiter mit Elaään!
.... und mir beweged eusi Wält.

Strophe 6 - Walliserlütisch

2tüsend Chinder reisunt a
Dü frägsch dich, wirts ächt güet ga
So eppis Riisigs bisch nid gigwennts
scho bald merksch dü das äs klappt
äs strahlut üs jedum Gsicht
Ja dine Mület der het schi gloooohnt.
... und wier bewege iischi Wält.

Outro (langsamer)

Es esch voll klar Liideschaft
Wo d' Jubla so wärtvoll macht
Und alles das ganz ohni Gäld
(Pause)
...Jo d' Jubla das esch öisi Wält!



Musik und Text: Dominik Riha und Barbara Ackermann
Anlässlich der zweiten jubla.bewegt-Zukunftskonferenz im Mai 2014.